

編號 1 號

【生趣个童年】黃美貞原作

還細時節，細人仔無電子產品做得搞；毋過，屋簷下、杌仔樹下、伯公下、大圳溝該、竹林肚，做下都係佢兜个遊樂園。

佢兜四姊妹，還過鄰舍个細人伴仔，輒常湊等份家啦飯仔、搞紙擲仔<sup>1</sup>、搞園人尋等等，係堵著毋使讀書个下晝頭，定著愛搞到斷烏，等到大人擎等竹修仔來尋細人仔，大家看著毋修勢<sup>2</sup>也，正溜瀉。

好天好時，佢兜乜好在圳溝肚覓蜆仔。有一擺，沙鼻个老弟喋喋滾，同大家打賭講佢捉得著細蝦公仔，上屋个阿賢好擲擲仔應：「該愛仰般賭？」老弟誚難佢：「你係捉到比佢較多，暗晡夜佢就請你食夜。」阿賢堪毋得人翕<sup>3</sup>，應講：「好，無問題！」該下晝，佢兜先攔水窟，想撈蝦公餵到水窟肚，毋過，細蝦公仔哪有恁該捉，兩下半仔蝦公就躍走哩，佢兜試著無意思，早就走淨淨。無想著佢兩儕定著愛比到有輸贏，目珠眨都毋眨，減到一

身溶潦、局局糟糟合泥了了，水窟肚就單淨攔著兩三尾細魚仔定定，等到暗摸胥疏也，佢兜正無結無煞、遽遽轉屋。管佢麼人輸贏！係還毋轉屋，毋單淨無飯好食，皮還愛弓絀啊正做得咧！

還有一擺，下晝頭當翕熱，佢兜恁多姊妹在屋側角搞園人尋。老弟係搞頭王，滿哪仔都尋得著來園，搞幾下輪都搞毋得煞棚。無想著，坐在屋簷下个阿婆大聲喊講：「遽遽轉來啊！莫在該頭牛眼樹下搞，該位盡多草鞋搭<sup>4</sup>哦！」頭擺个細人仔輒常打赤腳搞到毋知頭天，樂線樂線个佢兜，無撈阿婆个話聽入耳。結果，做鬼捉人个老妹忽然間看著該生到烏疏疏、有十過公分長个弄毛蟲，對等佢趕過來，佢嚇到尾瀉屎、走都走毋掣，嗶「哇！」聲仔嗽出來！嶄然好搞个老弟，興蹀蹀仔行兼想愛逐該尾草鞋搭，阿婆閱悴悴仔咄講：「你係畀趕到圓身項，該就貓拖糞耙啊——難敲爪哦！」

「良言莫嫌少，朋友莫嫌多。」還細時節，跔等同學伴仔、鄰舍个細人伴仔弛崗打陣共下搞，滿哪仔都係佢兜共下行過个腳跡、看過个景色、搞過个生趣事，乜係佢兜盡懷念个童年。該兜生趣个回憶撈畫面，永久都會留在吾个腦膈肚。

<sup>1</sup> 紙擲仔：音 zii` biag e`；紙牌，指孩童時期玩的圓形紙牌，圖案多為卡通人物或電視、電影劇中人物。

<sup>2</sup> 毋修勢：音 m` cam se；形勢不好、情況對自己不利。

<sup>3</sup> 翕：音 hib`；此指以言語威嚇或挑釁。

<sup>4</sup> 草鞋搭：音 co` hai` dab；大灰枯葉蛾的幼蟲。